

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 12
Hunyo 21, 2010
www.philippinerevolution.net

Editorial

Basagin ang mga reaksyunaryong ilusyon ng pag-asa

Isang ilusyon ng pag-asa ang hinahabi ng imperyalismong US at mga tagapamarali ng naghaharing sistema. Ang pagluluklok kay Benigno Aquino III bilang bagong pinuno ng papet na estado ay inilalarawan na senyal ng pagbabago matapos ang siyam na taon ng lansakang korapsyon, brutalidad at pagpapakapapet ng rehimeng Arroyo.

Ang hinahabing ilusyon ay pangunahing nakatuon sa paglalangis sa petiburgesyang lunsod para pagtibayin ang tiwala nila sa bagong rehimen at naghaharing sistema at ipakalat ang ilusyong iyon sa mamamayan. Layunin niyon na lambungan o bigyang-matwid ang pagpapatuloy ng mga anti-nasyunal, anti-demokrati-

ko at anti-mamamayang patakaran at programa ng papet na reaksyunaryong gubyerno at estado.

Malaking hamon kay Aquino ang pagtugon sa sigaw ng mamamayan at gumawa ng mga hakbang para usigin at parusahan si Gloria Arroyo. Sa kabilang panig, obligado si Aquino na tuparin ang kasunduan sa mga Arroyo na inareglo ng



Mga tampok sa isyung ito...

Pamana ni Arroyo kay Aquino
PAHINA 5

22 armas, nasamsam ng BHB
PAHINA 7

Parangal kay Joan Hinton
PAHINA 9

US upang tratuhing ala-Marcos o ala-Estrada si Arroyo sa harap ng mga kasong isasampa laban sa kanya. Layunin ng kasunduang ito ang mapanatili ang katatagan ng naghaharing uri at sistema, at maging ng paghahari ni Aquino.

Isinasakatuparan nito, sa isang antas, ang itinutulak ng US na pagpapababa ng tindi ng tunggalian ng mga naghaharing uri para konsolidadong mapagtuunan nila ang paglaban sa mamamayan.

Hindi pa man nakauupo, bumaling naman ngayon si Aquino sa pagpapababa ng mga inaasahan ng mamamayan upang hindi human-tong sa malaking galit at paglaban ang kanyang mga kabiguan. Sina-sabi niyang kailangang maging "reasonable" at "makatotohanan" ang mga ekspektasyon.

Sa gitna ng lumalalang krisis ng naghaharing sistema, mabilis na malalantad ang kahungkagan ng isilogang "kung walang korap, walang mahirap" ni Aquino. Lalong lalala at tatampok ang kahirapan sa harap ng kawalan ng programa ni Aquino para lutasin ang saligan at tampok na mga suliranin ng bayan. Manapa'y tiyak na magpapatuloy ang burukrata-kapitalismo at ko-

rapsyon na ngayo'y paghaharian ng bagong pangkat ng malalaking negosyante at burukrata na sumakay at namuhunan nang malaki sa kanyang kampanya.

Ibayong krisis ang sasalubong sa pagluklok ng rehimeng US-Aquino 2. Patuloy ang pagsadsad ng buong naghaharing sistema sa lalong papalalim na krisis at papatindi ang dinaranas na kahirapan ng mamamayan.

Sa malao't madali, ang papatinding diskuntento ng mamamayan at pagkawasak ng ilusyon ng pag-asa ay tutungo sa malawakang pagtutol at paglaban sa pagpapatuloy ni Aquino ng mga mapagsamantala at mapang-aping patakaran at palakad. Ang panawagan para sa rebolusyonaryong pagbabago ay mabilis na titimo sa isip ng mamamayan.

Sa harap ng patuloy na rebolusyonaryong paglaban ng mamamayan, sasalig nang malaki sa magkatuwang na paggamit ng panlililalang at pasismo ng estado ang rehimeng US-Aquino 2 para mapanatili ang kanyang paghahari. Asahang ibabalik at kakasangkapanin ni Aquino ang *low-intensity conflict* (LIC) katulad ng rehimeng US-Aquino 1.

Matatandaang ginamit ng rehimeng US-Aquino 1 ang posturang malinis, maka-demokratiko at maka-kapayapaan upang abusuhin ang kapangyarihan, dambungin ang kabang-bayan, samantalain ang mamamayan at pakawalan ang buong bangis ng pasistang pwersa ng estado para supilin ang mga lumalaban.

Walang iniwan sa masang mag-sasaka ang rehimeng US-Aquino 1 kundi isang huwad na programa sa reporma sa lupa. Masaker sa Mendiola at Lupao ang isinagot sa kanilang paglaban. Libu-libo ang ni-rekrut at inarmasan sa mga grupong paramilitar at panatikong kulto na ginamit para supilin ang mga pakikibaka ng bayan. Pinasigla ang anti-komunistang saywar.

Asahan nating muling gagamitin ni Aquino ang doble-karang taktika ng LIC. Asahan nating ipagpapatuloy ang kabangisan ng OBL 1 at 2 sa ilalim ng bagong katawagan na may lakip na mas matinding opensiba ng saywar.

Paaasahin ng rehimeng US-Aquino 2 ang mamamayan sa pamamagitan ng pagpapatupad ng pailan-ilang reporma. Tungo rito, kakasangkapanin ni Aquino ang mga repormista at huwad na progresibong grupo katulad ng Akbayan para makapagpanggap na itinaguyod nito ang interes ng mamamayan. Ang mga grupong ito ang mananawagan sa mamamayan para magpakakuntento sa mga pakitang-tao at bogus na solusyon, iwasan laluna ang usapin ng masaklaw na reporma sa lupa sa Hacienda Luisita at iba pang mga asyenda ng malalaking panginoong maylupa. Ilalayo nila ang mamamayan sa rebolusyonaryong landas at mapag-ibayo ang pampulitika at militar na pagbira sa rebolusyonaryong kilusan.

Sa kanayunan at mga komunidad ng mga manggagawa at maralita ng lunsod kung saan may pre-



Taon XLI Blg. 12 Hunyo 21, 2010

Ang *Ang Bayan* ay inilalabas sa wikang Pilipino, Bisaya, Iloko, Hiligaynon, Waray at Ingles.

Maaari itong i-download mula sa Philippine Revolution Web Central na matatagpuan sa:

www.philippinerevolution.net

Tumatanggap ang *Ang Bayan* ng mga kontribusyon sa anyo ng mga artikulo at balita. Hinihikayat din ang mga mambabasa na magpaabot ng mga puna at rekomendasyon sa ikau-unlad ng ating pahayagan. Maaabot kami sa pamamagitan ng email sa: angbayan@yahoo.com

Nilalaman

Editorial

Basagin ang mga ilusyon ng pag-asa 1

Dating gawi 3

Pananalanta ng pasistang estado

Aktibista, kagawad ng midya, pinaslang 4

Mga detenidong pulitikal, palayain 4

Ilitaw ang mga aktibista 5

Pamana ni Arroyo kay Aquino 5

Matatagumpay na TO

22 armas, nasamsam sa mga labanan 7

4 na bihag ng digma, pinalaya 7

Ka Roque: Milisya ng bayan 8

Magigiting na milisya 8

Joan Hinton, proletaryong internasyunalista 9

9th ID, sinungaling 10

Sa ibayong dagat

Oil spill sa Gulf of Mexico 11

Balita 11

Ang *Ang Bayan* ay inilalathala dalawang beses bawat buwan ng Komite Sentral ng Partido Komunista ng Pilipinas

sensya ang mga rebolusyonaryo at progresibong pwersa, magdidiin din ang rehimeng US-Aquino 2 sa higit na paggamit ng “civil-military operations” (CMO) lalo na kung saan maigting ang armadong paglaban at mga pakikibakang masa. Ito’y habang itinutulak ang brutal na kampanya ng panunupil.

Subalit lahat ng ito’y walang bisa sa harap ng puspusang pakikipaglaban ng mamamayan. Dapat pag-alabin ng mamamayan ang kanilang mga pakikibakang masa para sa tunay na reporma sa lupa at laban sa iba’t iba pang suliranin ng mga magsasaka sa kanayunan; laban sa di makatarungang sahod, kawalan at kaswalisasyon ng trabaho, tumataas na presyo ng mga bilihan at kasalatan ng mga serbisyong panlipunan tulad ng edukasyon, pabahay at pangkalusugan; laban sa korapsyon; laban sa pagpapataw ng karagdagang mga buwis at iba pang patakarang neoliberal na ipinataw ng IMF-WB; para sa pagtatanggol sa karapatang-tao at laban sa pasismo; laban sa panghihimasok-militar at mga pang-aabuso ng mga tropa ng US; at para sa tunay at makabuluhang pagsusulong ng usapang pangkapayapaan.

Hangad ng rebolusyonaryong kilusan ang pagpapatuloy pa rin ng matagal nang naudlot na negosasyong pangkapayapaan sa anumang reaksyunaryong gubyrno na nais umupo at makipag-usap. Gayunpaman, duda ang marami sa kaseryosohan ng bagong re-

himen sa usapang pangkapayapaan bilang larangan ng paglutas sa mga saligang suliraning nasa ugat ng armadong labanan. Nakikitang malaki ring sagka rito ang pangingibabaw ng mga panatikong anti-komunista sa panel ng Gubyrno ng Republika ng Pilipinas na interesado lamang sa paglusaw sa rebolusyonaryong kilusan.

Habang isinusulong ang rebolusyonaryong pakikibaka, dapat puspusang ipaglaban ng mamamayan ang mga pagbabago para itaguyod ang kanilang demokratisiko at pambansang interes. Habang pangunahin ang armadong rebolusyonaryong pakikibaka, may makakamit din sa larangan ng mga pakikibakang masa, parlamento at negosasyong pangkapayapaan. Kaalinsabay nito, dapat puspusang ilantad ang mga repormista at kunwa’y progresibong grupong ginagamit at nagpagamit sa reaksyunaryong sistema.

Dapat puspusan at tuluy-tuloy na dalhin at pahanungin ang mga kilusan at pakikibakang masa sa rebolusyonaryong pakikibaka bilang tanging daan sa tunay na pagbabago at pagkakamit ng mga patriyotiko at demokratikong interes ng mamamayan.

Ang anim na taon sa ilalim ni Aquino ang magsisilbing konteksto sa ibayong pagsusulong ng mga kilusan at pakikibakang masa at todong paglalarga ng pakikidigmang gerilya upang abutin ang yugto ng estratehikong pagkapatas ng digmang bayan. **AB**

Dating gawi

Alinsunod sa mga pahayag ni bagong presidente Benigno “Noy” Aquino III at ng mga taong nakapaligid sa kanya, walang maaasahang pagbabago sa bagong reaksyunaryong rehimen kaugnay ng palakad at mga patakaran sa ekonomya.

Sasahol pa ang pagsasamantala ng mga imperyalistang US, malalaking kumprador at malalaking panginoong maylupa, kabilang na ang Kamag-anak Inc. at mga namuhunan nang malaki sa kanyang kampanya.

Isang indikasyon lamang nito ang naging pagharap ni Aquino sa isyu ng kawalan ng lupa at hustisya sa Hacienda Luisita. Malinaw na wala siyang intensyon na resolbahin ang mga isyu sa loob ng asyenda.

Bago pa iproklama si Aquino, nagpahayag na ng tuwa at tiwala sa kanya ang samutsaring mga organisasyon ng mga malalaking da-

yuhan at lokal na negosyante. Kabilang dito ang US Chamber of Commerce at ang lokal na sangay nito, ang Joint Foreign Chambers of the Philippines at iba pa.

Hindi rin maikakaila na nasa likod ni Aquino ang ilan sa pinakamasasahol na tagapagtanggol ng mga patakarang neoliberal, kabilang ang dating tagapayo ni Arroyo na si Joey Salceda. Kahit si Mar Roxas, ang kanyang talunang bise presidente, ay nagsilbing kalihim ng Department of Trade and Industry sa ilalim ni Arroyo. Nariyan din sa likod ni Aquino ang mga nagpanukala at nagtulak na ipasa ang Value Added Tax (VAT) at iba

pang mga mapaminsala at kontra-mamamayang pakana ni Arroyo katulad nina Ralph Recto (dating hepe ng NEDA ni Arroyo) at Cesar Purisima, dating kalihim ng Department of Finance ni Arroyo.

Kinomisyon na ni Aquino ang isang tim mula sa School of Economics ng University of the Philippines para balangkasin ang kanyang adyenda sa ekonomya. Ang mga myembro ng akademya na ito ay naging mga tagapayo rin ni Arroyo. Kabilang sa mga itinutulak nila ang kagyat na pagpapatupad ng pagtataas ng VAT mula 12% tungong 15% at pagpapaliit ng bahagi ng mga serbisyong panlipunan sa pambansang badyet. Ang mga ekonomistang ito rin ang pangunahing tagapagtaguyod ng liberalisasyon, deregulasyon at iba pang neoliberal na reporma alinsunod sa balangkas at patakaran sa ekonomya ng imperyalismong US. **AB**



Aktibista, kagawad ng midya, pinaslang

Tatlong kagawad ng midya, isang aktibista at dalawang sibilyan ang pinakahuling mga biktima ng pamamaslang, ayon sa mga nakalap na ulat ng *Ang Bayan*.

Hunyo 19. Binaril hanggang sa mapatay ng isang hindi pa nakikilalang lalaki si Nestor Bedolido, isang manunulat para sa *Kastigador*, isang lingguhang pahayagan sa Davao del Sur. Pinatay si Bedolido pasado alas-7 ng gabi sa Digos City. Si Bolido ang pangatlong mamamahayag sa bansa na pinaslang sa loob lamang ng limang araw.

Hunyo 15. Pinagbabaril si Joeselito Agustin, 37, brodkaster ng dzJC Aksyon Radyo Laoag sa hangganan ng Laoag City at bayan ng Bacarra, Ilocos Norte. Namatay siya habang ginagamot sa ospital. Si Agustin ay kilala sa kanyang mga kritikal na komentaryo laban sa katiwalian sa prubinsya. Ayon sa isang saksi, ang pumaslang kay Agustin ay badigard ng isang lokal na pulitiko. Bago ito ay inistraping ang bahay ni Agustin sa Bacarra

noong Mayo 7. Si Agustin ay pangatlo na sa mga mamamahayag na pinaslang sa prubinsya.

Hunyo 14. Pinatay ng isang dinakilalang lalaki si Desidario "Jessie" Camangyan, 52, isang brodkaster ng Sunrise FM na nakabase sa Mati City. Pinaslang siya habang nagsisilbing *emcee* sa isang timpalak sa pag-awit sa Barangay Macopa, Manay, Davao Oriental bandang alas-10:30 ng gabi.

Ayon sa National Union of Journalists of the Philippines (NUJP)-Davao City, si Camangyan ay kilalang kritiko ng pagmimina at iligal na pagtotroso sa Davao Oriental. Siya at sina Agustin at Bolido ang ika-101, 102 at 103 mamamahayag na pinaslang mula nang manungkulan si Arroyo noong 2001.

Hunyo 14. Binaril hanggang mapatay ng dalawang lalaking ar-

mado ng pistolang kalibre .45 ang aktibistang si Benjamin Bayles, 42 anyos, sa Barangay Buenavista, Himamaylan City, Negros Occidental.

Si Bayles ay kasapi ng Karapatan, September 21 Movement at Bayan Muna.

Dalawang elemento ng 61st IB na suspek sa krimen ang inaresto ng pulisya sa isang tsekpoynt sa Kabankalan City. Nakumpiska sa kanila ang mga pistolang hinihinang ginamit sa pamamaslang.

Hunyo 1. Walang awang tinortyur at pinatay ng mga sundalo ng 9th IB ang mga sibilyang sina Jolito Etang at Borromeo Cabiles. Dinukot ng mga militar na nagpanggap na mga Pulang mandirigma ang dalawang sibilyan sa Sityo Canela, Barangay Baang, Mobo, Masbate. Natagpuan ang kanilang mga bangkay noong Hunyo 3. Bali-bali ang mga buto at basag ang bayag ng mga biktima nang sila ay matagpuan. AB

Pagpapalaya sa mga detenidong pulitikal, iginigiit

Palayain ang lahat ng mga detenidong pulitikal sa buong bansa! Ito ang iginigiit ngayon ng Samahan ng Ex-Detainees Laban sa Detensyon at Para sa Amnestiya (SELDA) sa bagong uupong pangulo na si Benigno "Noy" Aquino III.

Ayon kay Fr. Diony Cabillas, kasapi ng National Secretariat ng SELDA, may 317 na mga bilang-gong pulitikal sa iba't ibang kulu-ngan ng bansa mula pa noong Enero 2001 nang manungkulan si Gloria Arroyo hanggang nitong Marso 2010. Kabilang dito ang 43 *health workers* na iligal na inaresto sa reyd ng militar sa isang *resort* sa Morong, Rizal noong Pebrero 6.

Sila ay sinampahan ng mga ka-

so na kagaya ng mga karaniwang kriminal na karamihan ay hindi maaaring pyansahan tulad ng *murder*, *frustrated murder*, *kidnapping*, *arson* at *illegal possession of firearms*. Ilan lamang sa mga detenido ang sinampahan ng kasong rebelyon na pwedeng pyansahan.

Kung may kapasyahang pampulitika si Aquino, ani Fr. Cabillas, maaari na niyang palayain ang mga detenidong pulitikal na ito. Sa pi-



nakamenos, nananawagan ang SELDA na pabilisin ang paglilitis sa kanilang mga kaso.

Lahat ng mga detenido ay nakaranas ng iba't ibang anyo ng pisikal at sikolohikal na tortyur sa ilalim ng rehimeng Arroyo. AB

Pagsisiyasat sa *automated elections*, iginigiit

Kahit pa igiit ng COMELEC na saradong usapin na ang kredibilidad ng nagdaang eleksyon, hindi nito maitanggi ang kabi-kabilang mga katanungan at pagdududa sa isinagawa nitong kauna-unahang *automated* o de-kompyuter na bilangan ng mga boto noong Mayo 10 at ang pagiging lehitimo ng mga resulta nito. Tampok sa mga usapin ang panghihimasok ng US sa proseso.

Iba't ibang mga organisasyon at institusyon ang humihinging ipagpatuloy ang mga pagsisiyasat sa itinakbo ng *automated* na eleksyon. Nitong Hunyo 13, iginigiit ng Center for People's Empowerment and Governance (Cenpeg) sa mga upisyal ng COMELEC na ibukas ang lahat ng mga dokumento upang makagawa ang iba't ibang grupo ng komprehensibo at independyenteng pagsusuri at pagtatasa sa nagaganap na *automated* na eleksyon.

Hinihiling ng Cenpeg ang pagsasapubliko ng di bababa sa 22 mahalagang dokumento kabilang ang *source code* ng programang nagpapakatako sa kompyuter na pambilang ng boto, ang ulat ng transmisyon ng mga ito mula Mayo 10, imbensaryo ng mga ginamit na compact flash card pati na yaong bina-

wi at iba pa. Hinihiling din nilang isapubliko ang kontrata sa pagitan ng COMELEC at Smartmatic-TIM.

Naghapag din ang Ibon Foundation ng saligang katanungan kung bakit ipinaubaya ng Comelec at inilagay sa lubos na kontrol ng isang pribadong kumpanya ang pagpapakatako ng eleksyon. Ayon sa Ibon, ang paglalagay ng kontrol sa kabuuang proseso ng *automated elections* sa kamay ng isang pribadong kumpanya ay lumilikha ng malaking bulnerabilidad sa manipulasyon at pandaraya.

Ang pinakaseryosong batikos sa eleksyong Mayo 10 ay nagmula kay Prof. Jose Ma. Sison, tagapangulo ng International League of People's Struggle. Sa isang panayam sa Pinoy Weekly noong Hunyo 5, sinabi ni Sison na anim na linggo bago

ganapin ang halalan ay nag-usap-usap na sina Gloria Arroyo, ang US Central Intelligence Agency at kinatawan ng pamilyang Aquino na si Pinky Abellada para lutuin ang resulta ng *automated* na eleksyon.

Aniya, "May mga palatandaan na sa *automated electoral system* ng Smartmatic, na kontrolado ng US at mga ahente nila, may nagaganap na preprogramming para panalunin sina Benigno Aquino III at Jejomar Binay. Halatang kinaltasan ng napakalaking boto sina Manny Villar at Loren Legarda. Sobra at di kapani-paniwala ang biglang pagbagsak nila."

Tulad ng inaasahan, itinanggi ni Abellada at ng Malacañang ang akusasyon ni Sison. Sinabi ni Sison sa isang pahayag nitong Hunyo 12 na sa takdang panahon ay lilitaw ang kanyang impormante para sabihin kung kailan at saan nagkita sina Abellada at Arroyo. Pero bago niya ito gawin ay titiyakin muna ng impormante ang seguridad niya at ng kanyang pamilya. **AB**



Pamana ni Arroyo kay Aquino

Mamanahin ng bagong presidenteng si Benigno "Noy" Aquino III ang atrasado at bangkaroteng sistema na lalo pang binulok sa siyam na taong paghahari ng rehimeng Arroyo.

Sa isang paghahambing na ginawa ng Ibon Foundation, isang pribadong organisasyon sa pananaliksik, madilim ang kinabukasang iwan ng rehimeng Arroyo. Ikinumpara ng Ibon ang mga pangako ni Arroyo sa kanyang mga nagdaang talumpati sa mga aktwal na nagawa ng kanyang rehimen nitong nagdaang siyam na taon. Sumusunod ang mga pagkakaiba:

Sa pangako ng rehimeng sugpuin ang kahirapan: Mula 2000 hanggang 2006, nadagdagan ng mahigit kalahating milyon ang mga pamilyang naghihirap, ayon mismo sa konserbatibo nang mga estadistika ng National Statistical Coordination Board. Lumaki rin nang 2.1 pamilya o 27.6 milyong Pilipino ang naghihirap sa parehong panahon. Sa kabilang banda, lumaki nang mahigit ₱116 bilyon ang netong kita ng pinakamayayamang kumpanya sa Pilipinas.

Sa pangakong pamamahagi ng lupa: Si Arroyo ang may pinaka-kaunting naipamahaging lupain kumpara sa mga rehimen pagkabagsak ng diktadurang Marcos. Ayon sa Department of Agrarian Reform, umabot lamang sa 119,301 ektarya bawat taon mula 2001 hanggang 2008 ang naipamahaging lupa sa ilalim ng rehimeng Arroyo. Hindi nito inabot ang napakaliit na ngang ipinangakong ipapamahagi na 200,000 ektarya bawat taon (100,000 ektarya ng pribadong lupa at 100,000 ektarya ng pampublikong lupa.)

Sa pangakong magkakaroon ng bago at dagdag na mga trabaho: Sa siyam na taong paghahari ng rehimen ay siyam na taon ding naitala ang pinakamatataas na tantos ng disempleyo. Nasa abereyds na 11.2% ang itinalang tantos ng disempleyo sa mga minanipula nang datos ng National Statistics Office. Umabot sa 4.3 milyong Pilipino ang walang trabaho nitong Enero 2010, mas mataas nang 730,000 kumpara noong Enero 2000. Ang mga kulang sa trabaho ay nasa 7.1 milyon na, mas mataas nang 2.4 milyon kumpara noong Enero 2000.

Ipinagmamalaki ni Arroyo na may nalikhang 877,00 trabaho kada taon mula Enero 2001 at umabot umano ito sa 36 milyon pagdating ng Enero 2010. Pero karamihan ng mga trabahong ito ay partaym at mababa ang kalidad. Malaking bahagi sa itinuturing ng rehimen na “may trabaho” (36 milyon) ay nasa categoryang “manggagawang kapamilya na hindi sumasahod.” Ang 12.1 milyon naman ay nasa categoryang “umeempleyo sa sarili” at nasa 12.6 milyon naman (o sangkatlo lamang) ang maituturing na sahurang mga manggagawa.

Sa sektor ng agrikultura, umabot lamang sa 172,600 ang nalikhang mga bagong trabaho bawat

taon nitong nakaraang siyam na taon. Noong 2009, bumagsak sa pinakamababang antas ang produktibidad sa sektor. Umabot lamang sa 18.1% ang bahagi nito sa GDP ng bansa, pinakamababa sa buong kaysaysayan ng Pilipinas.

Sa loob ng 2001-2009, pinakamarami ang mga Pilipinong nahanap ng trabaho sa labas ng bansa. Bawat taon, tinatayang umabot sa 1.04 milyon ang nag-aplay at namasukan sa ibayong dagat, kumpara sa 500,000 Pilipino noong panahon ni Aquino, 713,505 noong panahon ni Ramos at 839,324 noong panahon ni Estrada. Nasa 1.42 milyon ang lumabas ng bansa noong 2009, o katumbas ng 3,898 Pilipino bawat araw. Ayon sa Department of Foreign Affairs, umaabot na sa siyam na milyong Pilipino ang nagtatrabaho sa labas ng bansa.

Sa pagtugon sa karaingan ng madla: Ang rehimeng Arroyo ang may rekord ng pagpapairal ng pinakamaliit na dagdag sa sahod mula pa noong diktadurang Marcos. Umaabot lamang sa ₱5 ang tunay na halagang naidagdag sa sahod sa loob ng siyam at kalahating taon.

Sinagkaan nito ang pagpapasa ng panukala para ₱125 dagdag na sahod na matagal nang hinihiling ng mga manggagawa at mga unyon nila. Palaki nang palaki ang agwat sa pagitan ng minimum na sahod (₱404 sa NCR) at nakabubuhay na sahod para sa isang pamilyang may anim katao (₱957 nitong Hunyo 2010)

Sa pagkalinga sa bawat Pilipino: Naglaan lamang ang rehimeng Arroyo ng 15.1% ng pambansang badyet para sa edukasyon, mas mababa kaysa nagdaang dalawang rehimen. Para sa serbisyong pangkalusugan, naglaan lamang ito ng 1.8% at para sa pabahay, 0.4%

Sa larangan ng edukasyon, dumami nang 2.45 milyon ang bilang ng mga bata at kabataang di naka-

pag-aral mula 2001-2009. Halos limang milyong bata at kabataan na ang hindi nag-aaral sa kasalukuyan.

Sa pagtatatag ng “bagong ekonomya,” pagsusulong tungo sa istatus ng First World at ibang kahibangan: Iwinawasiwas noon ng rehimen ang Business Process Outsourcing (BPO,) mas kilala sa mga *call center*, bilang “bagong” industriya na magsusulong sa bansa tungo sa kaunlaran. Mabilis ang paglawak ng naturang mga kumpanya pero sa kabila nito, umaabot lamang sa 1.3% ng kabuuang mga bagong trabaho ang nalikha nito at 2% lamang ang naiambag nito sa GDP.

Sa kabilang banda, lumiit nang lumiit ang sektor ng pagmamamunipaktura tungo sa lebel nito noong dekada 1950. Nakalikha lamang ito ng mahigit 15,000 trabaho taun-taon mula Enero 2001 o tatlong milyon matapos ang isang dekada. Mas marami pang trabaho para sa mga katulong sa bahay ang nalikha sa parehong panahon (mahigit 100,000 bawat taon.) Halos magkapantay na ngayon ang bilang ng mga katulong sa bahay at mga manggagawang nasa sektor ng mamunipaktura.

Dagdag dito, lalong naging bangkarote ang dati nang bulok na reaskyunaryong gubyrerno. Umabot sa ₱1.34 trilyon ang pangkalahatang depisit mula 2001 hanggang 2009 o triple sa pinagsanib na depisit ng nagdaang tatlong rehimen na umaabot lamang sa ₱422 bilyon. Nagbayad ng aabot sa ₱5.1 trilyon utang ang rehimen sa parehong panahon. Sa kabila nito, patuloy na lumaki ang utang ng gubyrerno tungong ₱4.36 trilyon noong Pebrero 2010 o mahigit doble ng ₱2.17 trilyong utang sa ilalim ng rehimeng Estrada. Mula nang mauupo ito sa poder, umabot sa ₱243 bilyon ang taunang inuutang ng rehimeng Arroyo. AB



22 armas, nasamsam sa mga labanan

Dalawampu't dalawang armas ang nakumpiska ng mga Pulang mandirigma ng Bagong Hukbong Bayan (BHB) sa magkakahiwalay na opensiba nitong Hunyo 8 at Hunyo 13.

Tatlong M16, limang Garand at isang karbin ang nakumpiska ng mga Pulang mandirigma ng Julito Tiro Command ng BHB sa North Central Mindanao nang salakayin nila ang detatsment ng CAFGU sa Pigdosoon, Binicalan, San Luis, Agusan del Sur nitong Hunyo 13. Mabilis na natapos ang labanan nang masugatan ang tatlong ele-

mento ng CAFGU at sumurender ang isa pa. Walang tinamong pinsala ang BHB.


Sampung armas naman ang nasamsam ng mga Pulang mandirigma ng Jose Rapsing Command sa dalawang operasyong disarmang noong Hunyo 8.

Dalawang ripleng M16, isang .45, dalawang .38 at mga bala ang nasamsam nang salakayin nila ang bahay ni Roly Jimena, isang mangangalabaw at myembro ng pribadong hukbo ni dating Mayor Zacarina Lazaro ng San Pascual, Masbate.

Dinisarmahan din ng komand ang apat na siga sa Barangay Dangpanan, Placer at Barangay Robog, Cawayan ng dalawang .45, dalawang .38 at isang .357. Ginagamit ng mga siga ang mga baril na ito sa pananakot sa mga sibilyan.

Samantala, pinasabugan ng eksplosibo ng BHB ang sinasakyan ng 12 myembro ng PNP Regional Mobile Goup habang papauwi na ang mga pulis mula sa pagresponde sa operasyong disarmang ng mga Pulang mandirigma sa Placer.

Sa Agusan del Sur naman, tatlong *shotgun* ang nakumpiska ng mga Pulang mandirigma ng Larangang Gerilya 21-b at 8 mula sa tatlong gwardya ng Sodaco, isang kumpanyang nagmamanupaktura ng *palm oil*, sa Sityo Thankiu, Puruk 8, Barangay Santa Teresita, Bayugan City. Sinunog din ng mga gerilyang bayan ang dalawang trak ng kumpanya.



4 na bihag ng digma, pinalaya

Makaraan ang mahigit isang buwang pagkakabihag, pinalaya ng Merardo Arce Command (MAC) ng BHB-Southern Mindanao Region ang apat na bihag ng digma noong Hulyo 15 sa kabila ng tuluy-tuloy na mga *rescue operation* ng mga tauhan ni Maj. Gen. Carlos Holganza ng 10th ID.

Isinagawa ng Crucifino Uballas Command (CUC) ng BHB ang pagpalaya sa Sityo Linao, Barangay Teresa, Maco, Compostela Valley kina Cpl. Marcial Bawagan, Ariel Asumo at Edmundo Alcala ng Philippine Army at Victor Pitogo, isang tauhan ng CAFGU.

Pinalaya sila sa ayon sa makataong konsiderasyon sa kabila ng kanilang seryosong paglabag sa karapatang-tao at internasyunal na makataong batas. Binigyang konsiderasyon ang mga apela ng kanilang mga pamilya, mga relihiyosong grupo at indibidwal at mga kilala at respetadong mga grupo at indibidwal.

Sa pagpapalaya sa kanila, binibigyan din ng pagkakataon ang mga naging bihag na tuluyan nang magbago. Ayon kay Ka Anvil Guinto, tagapagsalita ng CUC, "ang paghuli at detensyon sa kanila ay magsisilbi ring babala sa mga upisyal at tauhan ng AFP, PNP at mga paramilitar."

Sa panahon ng pag-aresto, detensyon at imbestigasyon mula Mayo 12, iginalang ng CUC ang mga karapatan ng mga bihag alinsunod sa Geneva Conventions and Protocols at sa patakaran ng BHB hinggil sa makataong pagtrato sa mga bihag-ng-digma. Kinilala ng BHB ang pagtulong at pag-asikaso ng simbahan, lokal na yunit ng guberno, mga nagtataguyod ng kapayapaan at karapatang-tao at mga indibidwal at organisasyon para maging maayos at ligtas ang pagpapalaya sa mga bihag.

Samantala, nakabihag muli ng dalawang armadong galamay ng guberno ang mga gerilya ng BHB nang arestuhin nila sina S/Sgt. Bienvenido Arguilles ng 25th IB at Job Latiban, elemento ng CAFGU sa ilalim ng 72nd IB sa Barangay Upper Ulip, Monkayo, Compostela Valley nitong Hunyo 19. Nahuli ang dalawa nang dumaan sila sakay sa isang motorsiklo sa tsekpoynt na itinayo ng mga Pulang mandirigma. Patungo sana sila sa kanilang detatsment sa Mount Di-

AB

AB

Ka Roque: Milisya ng bayan


Si Ka Roque ay myembro ng milisyang bayan (MB) na kumikilos sa kanilang baryo sa Northeastern Mindanao.

Ibinahagi ni Ka Roque na bilang mga kasapi ng MB, dumaraan sila sa tuluy-tuloy na konsolidasyon sa ideolohiya, pulitika at organisasyon. Sa ilalim ng Sangay ng Partido sa lokalidad, sila ay may grupo ng Partido sa loob ng MB na siyang nagbibigay-direksyon dito, nagbubuo ng mga plano at tumitiyak sa pagpapatupad nito.

Ang plano ng kanilang yunit ng MB ay nakaayon sa plano ng kumand ng BHB sa kanilang lugar. Bahagi ng kanilang regular na tungkulin ang pagtitiyak ng seguridad ng komunidad. Regular silang nagrerekorda at nagsasagawa ng paniniktik. Mataman nilang minamanman ang kilos ng kaaway. Mahigpit silang nagkokoordina sa BHB at tumatalima sa mga tagubilin at kagyat na paabot ng kumand nito.

Bahagi rin ng serbisyo nila ang paglutas ng mga pang-araw-araw na suliranin ng masa at pagresolba ng mga hidwaan sa hanay ng masa. Dahil sa kanilang presensya, napawi ang kriminalidad at napalayas ang mga aset na itinanim ng kaaway sa kanilang baryo. Ipinatutupad din ng MB ang mga patakaran ng lokal na rebolusyonaryong awtoridad katulad ng pagbabawal sa komersyal na pagtotroso. Epektibo nilang naipatutupad ang mga batas at patakaran, ani Ka Roque, dahil sa masiglang paglahok ng masa.

Madalas na nakalahok ang mga kasapi ng MB sa mga inilulunsad na pagsasanay-militar ng BHB. Ang mga *drill* naman ay inilulunsad



nila nang sarilinan. Lagi silang may gawaing edukasyon tuwing sila'y nakatipon.

Pinakikilos din ang MB sa pagsusulong ng rebolusyong agraryo, kampanya sa kalusugan, gawaing edukasyon at pag-oorganisa. Tumutulong sila sa pagtatayo ng rebolusyonaryong organisasyon ng Lumad, o di kaya'y grupo ng magsasaka, kabataan at kababaihan. Nagbibigay din sila ng edukasyon sa masa kabilang ang Batayang Kursong Pampartido. Isinusulong nila ang gawaing produksyon sa nasasaklaw nilang lugar.

Gumagampan din sila ng mga tungkulin sa pagpapalawak. Depende sa atas, maaari silang lumipat sa ibang lugar para doon magorganisa. May ilang panahon din na sumasanib sila sa yunit ng hukbo, tulad kung may ilulunsad na taktikal na opensiba. Kapag makilos ang kaaway sa baryo, ang ilang tukoy na milisya ay pinakokonsentra upang umiwas sa panunupil ng kaaway.

Ang asawa ni Ka Roque ay kasapi rin ng Partido at aktibo sa paggampan ng mga rebolusyonaryong gawain. Dahil halos nakatuon na ang kanilang buong panahon sa kanilang rebolusyonaryong pagkilos,

Magigiting na milisya

Kabilang sa mga kasapi ng milisyang bayan ang mahuhusay na mandirigma at may maniningning na tagumpay sa digmaan. Sa erya nila Ka Roque, palaging paksa ng kwentuhan ng masa at mga mandirigma ang pagpapabagsak ng isang kasapi ng MB sa isang helikopter noong dekada 1990. Noong 2006, nakapagpasabog sila ng tangke.

Kabilang sa pinakamahuhusay na isnayper sa Northeast Mindanao si Ka Dandy, isang kasapi ng MB. Bago siya mamartir noong 2002, si Ka Dandy ay kabilang sa may pinakamatitingkad na rekord sa isnayping gamit ang ripleng Garand na may nakakabit na *scope*. Tinatayang umabot sa 50 ang mga naidulot na kaswalti sa kaaway ng pang-iisnayp ni Ka Dandy.


Ilang mis-engkwentro ng kaaway ang napasimulan ng mga MB. Nagagawa nila ito sa pamamagitan ng mabilis na pagpapagitna ng isang 2-3 kataong tim ng MB sa dalawang kolum ng kaaway at pagpapaputok sa magkabilang panig at mabilis na pag-alis. May pagkakataong inabot ng isang oras na pagpuputukan ang kaaway. Umabot na sa 100 ang mga sundalong napatay sa gayong mga mis-engkwentro.

AB

nagpasya ang organisasyong masa na suportahan sila sa ilan nilang pangangailangan. Bukod sa indibidwal nilang taniman na pinapalago sa sama-samang paggawa, mayroon ding komunal na taniman na siyang pinagkukunan naman ng pantustos sa kanilang gamit-militar tulad ng bakpak at bota. “Kaya bihira ang nagigipit,” diin ni Ka Roque, “Nagugutom lang kami kapag napipilitan kaming lumikas dahil sa militarisasyon.”

Dahil kabisado ni Ka Roque at ng mga katulad niyang pwersa ng MB ang kalupaan sa kanilang lugar, sila ang pinakamahusay na magsilbing *advance force* ng BHB sa pagkilos nito sa kanilang erya. Dahil din sa palagian silang nasa lugar, mahigpit nilang nasusubaybayan ang kilos ng kaaway. Nang pumasok ang kaaway sa kanilang baryo, nag-inisyatiba silang maghanda ng mga pasabog upang iharas ang kaaway at maghintay ng kumand mula sa BHB.

Tulad ni Ka Roque, kabilang sa mga pwersa ng MB ang pinakamahusay na gerilyang mandirigma. Ang kanilang kasaysayan ay kasaysayan ng maniningning na tagumpay sa larangan ng pakikipagdigma.

Sa kanilang paglahok sa digmang bayan, batid ni Ka Roque ang mga sakripisyo na kaakibat na ng pakikipaglaban. Tuwing pinapasok ng kaaway ang kanilang lugar, kabilang si Ka Roque at kanyang pamilya sa pinag-iinitan ng pasistang kaaway. Subalit ang lahat ng ito ay handa niyang harapin at labanan, sampu ng Partido at mga rebolusyonaryong organisasyong masa. Sa pamamagitan ng paggamit ng iba't ibang angkop na mga taktika at sama-samang pagkilos, puspusan nilang nabibigo ang pasistang panunupil ng kaaway at tuluy-tuloy na nakapagaambag sa pagsusulong digmang bayan. 

Joan Hinton, proletaryong internasyunalista

Sa ngalan ng sambayanang Pilipino at kanilang mga rebolusyonaryong pwersa, ang pamunuan at kasapiang ng Partido Komunista ng Pilipinas (PKP) ay nag-uukol ng pinakamataas na parangal kay Kasamang Joan Hinton, walang kapagurang komunista, anti-rebisyunista at proletaryong internasyunalista.

Lubos na ipinagdadalamhati ng uring manggagawa at mga aping bayan sa buong mundo ang pagpanaw ni Kasamang Joan noong Hunyo 8. Siya ay 89 na taong gulang. Nagpapaabot kami ng taos-pusong pakikiramay sa kanyang mga anak, pamilya, kaibigan, kasama at lahat ng mamamayang pinaglingkuran at minahal niya.

Sa kalakhang bahagi ng kanyang buhay, si Ka Joan, sampu ng kanyang asawang si Ernest “Sid” Engst at kapatid na si William (Bill), ay naglingkod sa sambayanang Tsino at walang sawang nag-sikap kasama nila sa rebolusyonaryong pakikibaka para ipundar ang sosyalismo sa China. Siya at ang kanyang asawa ay nagtrabaho sa iba’t ibang empresang bayan, kabilang ang isang pabrika ng bakal, iba’t ibang *dairy farm* at iba pang proyektong pang-agrikultura na pinaglaanan nila ng lahat ng kanilang pagsisikap at kadalubhasaan. Tuluy-tuloy siyang nakipamuhay sa mga manggagawa at magsasaka, tumulong sa pagtatayo ng Partido, nagtaguyod sa Marxismo-Leninismo at lumaban sa rebisyunismo at panunumbalik ng kapitalismo sa China.

Si Kasamang Joan ay isa sa mga unang *nuclear physicist* sa US noong dekada 1940. Isa siya sa mga pinili ng gubyrnong US para bumuo ng isang pangkat sa Los Alamos, New Mexico na lihim na magsasagawa ng Manhattan Project para sa pagbubuo ng kaunahang bomba atomika. Ang paghuhulog ng bomba atomika ng

US sa Hiroshima at Nagasaki at ang malawakang pinsalang idinulot nito sa mga inosenteng mamamayang Hapones noong 1945 ay gumimbal at gumalit kay Kasamang Joan, kaya iniwan niya ang proyekto.

Naganyak siyang tumungo sa China noong Marso 1948 ng katiapan niyang si Sid na nauna na sa China noong 1945 at lumahok sa rebolusyong Tsino at sa gawain sa mga pinalayang purok sa pamumuno ng Communist Party of China (CPC) at ni Tagapangulong Mao Zedong. Si Sid ay Amerikanong dalubhasa sa agrikultura. Nagpakasal sila noong 1949 sa Yanan, ang pangunahing base ng rebolusyonaryong gubyrnong bayan noong papatagumpay na ang pambansa-demokratikong rebolusyon sa China at pasisinayaan na ang Republikang Bayan ng China.

Noong sumunod na ilang dekada, itinuon nina Kasamang Joan at Sid ang lahat ng kanilang pagsisikap sa rebolusyong Tsino at adhi-kaing sosyalista. Sa kanilang paglilingkod sa sambayanang Tsino, tinutulan nila ang espesyal na trato sa mga “dayuhang eksperto” at humiling sila ng parehong pagtrato, ng pamumuhay na katulad sa mga lokal na eksperto at huwag itangi batay sa kanilang ispesyalisasyon. Nagtrabaho siyang kapanatay ng mga manggagawa at magsasaka habang ipinupundar nila ang sosyalismo mula dekada 1950 hanggang dekada 1970, itinatayo ang kanilang mga komuna, pinaunlad ang mga industriya at agri-

kultura, nagsasagawa ng punahan, kinokonsolida ang partido, nag-aaral ng Marxismo-Leninismo-Maoismo at nakikipaglaban sa rebisyunismo.

Nasaksihan at naranasan niya ang mga kabiguan sa pakikibaka para sa sosyalismo na tumungo sa panunumbalik ng kapitalismo sa China nang maagaw ng mga rebisyunista ang kapangyarihan sa loob ng CPC mula 1976. Binatikos niya ang paglitaw ng pagsasamantala sa China habang binabaklas ng rebisyunistang liderato ni Deng Xiaoping ang sistemang sosyalista at hinahawan ang daan para sa pagbabalik ng malaking burgesya at mga dayuhang monopolyo kapitalista sa China. Dahil sa walang takot at walang kamatayan niyang katapatan sa adhikaing sosyalista at rebolusyong proletaryo kaya nagpatuloy siya sa rebolusyonaryong gawain at sa pakikibaka para sa sosyalismo sa China sa kabila ng maraming kahirapang kinaharap niya, ng kanyang pamilya at mga katuwang niya mula nang mangibabaw ang rebisyunismo at iurong nito ang sosyalistang rebolusyon sa China.

Si Kasamang Joan, gayundin ang asawa niyang si Sid at kapatid na si Bill ay mga malaon nang kaibigan ng rebolusyong Pilipino. Ang mga akda nilang naglalahad ng kanilang mga karanasan sa pagpupundar ng sosyalismo sa China mula dekada 1950 hanggang 1976 at paglitaw ng rebisyunismo at panunumbalik ng kapitalismo sa China mula 1977 ay kinawiwilhang basahin ng mga Pilipinong komunista at rebolusyonaryo. Ang mga ito ay nagpakita sa mga Pilipinong komunista at rebolusyonaryo ng malinaw na larawan ng araw-araw na mga pakikibaka at praktikal na aral ng mamamayang Tsino sa pagsasanib ng mga katuruang Marxist-Leninista-Maoista sa kongkretong karanasan sa konteksto ng re-

bolusyong Tsino, laluna sa pagsasakutuparan ng rebolusyonaryong agraryo at pagsusulong ng sosyalistang transpormasyon ng agrikultura. Ang matatalas nilang pagsusuri at pagpuna sa rebisyunismo at panunumbalik ng kapitalismo ay nakapagpayaman pa sa ating paggagap sa Marxismo-Leninismo-Maoismo.

Tumulong siya sa pagbubuo ng pagkakaisa ng sambayanang Pilipino at Tsino. Naging napakainteresado niya sa pag-unlad ng rebolusyong Pilipino sa pamumuno ng PKP at sumuporta siya sa ilang progresibong laban sa Pilipinas. Bumisita siya sa Pilipinas kasama ang kapatid niyang si Bill noong 1996 para lumahok sa People's Campaign Against Imperialist Globalization at sa People's Caravan laban sa APEC Summit. Mainit niyang tinanggap ang mga Pilipinong kasama na dumalaw sa China at nakipagkaibigan siya sa mga pwersang progresibo at demokratiko sa Pilipinas. Partikular siyang nagtutong ng interes at malapit na pakiki-

pagkaibigan sa mga Pilipinong kasamang babae.

Si Kasamang Joan ay matatag na proletaryong internasyunalista. Tumatagos sa hangganan ng mga bansa ang katapatan niya sa uring manggagawa at mamamayan. Ang kabuluhan ng kanyang pagsisikap at mga akda ay nag-ambag nang malaki sa proletaryong kontra-opensiba sa ideolohiya noong dekada 1990 at sa pagpapanibagong-sigla ng mga rebolusyonaryong pakikibaka nitong nagdaang dekada.

Patuloy siyang magsisilbing inspirasyon sa mga aping Tsino, Pilipino, Amerikano at iba pang mamamayan, at sa lahat ng biktima ng imperyalistang globalisasyon, malakolonyal at malapyudal na pang-aapi at kapitalistang panunumbalik. Ang kanyang alaala ay habampanahon nang nakaukit sa mga puso ng proletaryado ng mundo habang patuloy nilang isinusulong ang kanilang istorikong misyong wakasan ang kapitalismo, itatag ang sosyalismo at kamtin ang komunismo. **AB**

9th ID, sinungaling

Mariing pinabulaanan ng National Democratic Front (NDF)-Bicol ang ipinangangalandakan ng 9th ID na nabawasan nito nang 70% ang lakas ng Bagong Hukbong Bayan (BHB) sa rehiyon mula sa mahigit 350 umanong lakas-tauhan nito noong 2008. Sa isang pahayag sa midya nitong Hunyo 19, sinabi ni Ka Greg Bañares, tagapagsalita ng NDF-Bicol, na sa katunayan ay mas lumakas at napanday ang BHB sa pagharap sa Oplan Bantay Laya 2 at pursigido itong maglunsad ng mas marami pang mga opensiba sa susunod na mga buwan at taon.

Ani Bañares, nag-iimbento ng mga tagumpay si Maj. Gen. Ruperto Pabustan upang pagtakpan ang kabiguan ng 9th ID na lumpuhin o pahinain ang armadong kilusan ng mamamayan sa rehiyon. Aniya, pansaywar lamang ito ng AFP upang pahupain ang kasigasi-gan at paglaban ng mamamayan para sa pagbabago ng lipunan.

Idiniin ni Bañares na walang kahit isang larangang gerilyang nawasak sa rehiyon mula 2001 hanggang 2010. Aniya, buo at matatag ang mga kumand ng BHB mula larangan hanggang antas-rehiyon at ilang beses na mas malaki ang bilang ng mga Pulang mandirigma at kumander ng BHB kumpara sa paltos na pagtaya ng AFP.



Kasakiman at ang *oil spill* sa Gulf of Mexico

Mahigit dalawang buwan nang bumubulwak sa Gulf of Mexico ang krudong langis mula sa butas na mga tubo sa dagat na pagmamay-ari ng British Petroleum (BP). Mabilis na kumalat ang krudong langis sa ibabaw ng dagat at di bababa sa 64,750 kilometro kwadrado na ang sinaklaw nito.

Pinakamalubhang apektado ng pagkalat ng langis ang estado ng Louisiana sa US. Tinataya noong Mayo 30 na mahigit 110 kilometro ng baybayin nito ang lubhang na-apektuhan. Mas malawak pa ang nasasaklaw ng langis na kumakalat sa ilalim ng tubig. Sa pinakahuling pagtaya, maaaring umabot na sa 60,000 bariles ng langis ang araw-araw na tumatapon sa dagat nitong nakaraang anim na linggo.


Nabutas ang naturang mga tubo noong Abril 20 matapos pumutok at bumagsak sa dagat ang isa sa mga istruktura ng BP na naghaanap ng krudong langis sa gitna ng Gulf of Mexico. Labing-isang manggagawa na noo'y nagtatrabaho roon ang nasabugan at hanggang ngayon ay di pa natatagpuan. Ilang linggo bago ito, inireklamo na ng mga manggagawa ang pagbabalewala ng BP sa mga regulasyong pangkaligtasan dahil sa pagmamadali at pagtitipid.

Dati nang binalaan ng mga eksperto ang gubyernong US kagugnay ng mga panganib ng pagmimina ng langis sa ilalim ng dagat. Pero sa halip na maghigpit, niluwagan pa ng gubyernong US ang mga regulasyong pangkaligtasan dahil lamang sa sinabi ng mga kumpanya ng langis, kabilang ang BP, na sapat na ang kanilang teknolohiya para maiwasan ang gayong mga sakuna.

Bukod sa masangsang na amoy, walang kapantay na pinsala

ang idinudulot ng pagtagas ng langis sa Gulf of Mexico at kalapit na mga latian. Inilalagay nito sa panganib ang libu-libong klase ng mga hayop sa dagat at mga ibong umaasa sa dagat para sa kanilang pagkain at tirahan. Ayon sa isang ahensya, umaabot na sa \$1.6 milyon ang nawalang kita ng mga residente ng kalapit na mga lugar at isla na apektado ng pagtagas. Bilyun-bilyong dolyar pa ang mawawala sa mga negosyo at kabuhayang nakaasa sa golpo at sa mga isla rito.

Ang BP, isang kumpanyang British, ang pinakamalaking kumpanya sa United Kingdom at pangapat na pinakamalaking kumpanya sa buong mundo. **AB**



Mataas na singil ng *toll fee* sa SLEx, tinututulan

TINUTUTULAN ng Bayan Muna at mga samahan ng transportasyon ang 250-260% pagtataas ng *toll fee* o taripa sa South Luzon Expressway (SLEx) sa Hunyo 30.

Ang dagdag na singil ay tinawag na "*midnight highway robbery*" ni Rep. Teodoro Casiño ng Bayan Muna.


Mariin din itong tinututulan ng South Luzon Bus Operators Association, Confederation of Truck Association of the Philippines at Christian International for Transparency and Accountability. Nag-sampa rin ng protesta ang apat na kongresista ng Laguna.

Nanawagan si Casiño sa Department of Transportation and Communications na ibasura ang panukalang pagtataas sa *toll fee*.

Tataas din ang presyo ng mga produktong agrikultural, pamasahe at iba pang saligang kalakal mula sa mga prubinsya dahil sa pagtaas ng singil ng *toll fee*, dagdag ni Casiño.

Pinahintulutan ng Toll Regulatory Board (TRB) ang South Luzon Toll Corporation, ang tagapamahala ng SLEx, na magtaas ng singil mula Alabang patungong Calamba, Laguna. Mula sa 82 sentimo kada kilometro, magbabayad na ang saksyang dadaan dito ng ₱3.52. Umaabot sa 200,000 motorista bawat araw ang minimum na dumaraan sa SLEx. Kapag natuloy ang pagtataas, kokolekta ang SLEx ng karagdagang ₱14 milyon kada araw.

Hiniling naman ng Pinagkaisang Samahan ng Tsuper at Opreytors Nationwide o PISTON kay Aquino na kaagad na pawalambisa ang dagdag na singil oras na mauupo siya bilang pangulo.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Taon XLI Blg. 12
Hunyo 21, 2010
www.philippinerevolution.net

Editorial

Basagin ang mga reaksyunaryong ilusyon ng pag-asa

Isang ilusyon ng pag-asa ang hinahabi ng imperyalismong US at mga tagapamarali ng naghaharing sistema. Ang pagluluklok kay Benigno Aquino III bilang bagong pinuno ng papet na estado ay inilalarawan na senyal ng pagbabago matapos ang siyam na taon ng lansakang korapsyon, brutalidad at pagpapakapapet ng rehimeng Arroyo.

Ang hinahabing ilusyon ay pangunahing nakatuon sa paglalangis sa petiburgesyang lunsod para pagtibayin ang tiwala nila sa bagong rehimen at naghaharing sistema at ipakalat ang ilusyong iyon sa mamamayan. Layunin niyon na lambungan o bigyang-matwid ang pagpapatuloy ng mga anti-nasyunal, anti-demokrati-

ko at anti-mamamayang patakaran at programa ng papet na reaksyunaryong gubyerno at estado.

Malaking hamon kay Aquino ang pagtugon sa sigaw ng mamamayan at gumawa ng mga hakbang para usigin at parusahan si Gloria Arroyo. Sa kabilang panig, obligado si Aquino na tuparin ang kasunduan sa mga Arroyo na inareglo ng



Mga tampok sa isyung ito...

Pamana ni Arroyo kay Aquino
PAHINA 5

22 armas, nasamsam ng BHB
PAHINA 7

Parangal kay Joan Hinton
PAHINA 9

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Dinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angbayan@yahoo.com*